

Obraćanje visokog predstavnika i specijalnog predstavnika EU Valentina Inzka na svečanosti posvećenoj uvaženim “Prijeteljima Evrope” u Bosni i Hercegovini



Izborna kampanja je prilika da se okonča zastoj

Dame i gospodo,

Dozvolite mi da prvo kažem da mi je veliko zadovoljstvo što sam ovog proljetnog jutra ovdje s vama u Bihaću.

A posebno mi je zadovoljstvo što smo se ovdje okupili da odamo priznanje građanima koji su se dokazali kao uvaženi “Prijetelji Evrope” – ljudi koji su dali istaknut doprinos u približavanju Bosne i Hercegovine punom članstvu u Evropskoj uniji.

Ovaj projekat uživa punu podršku ogromnog broja građana BiH, to smo već čuli od predsjedavajućeg Vijeća ministara Špirića. To znači da su “Prijetelji Evrope”, kojima danas ovdje odajemo priznanje zbog toga što su težnje miliona građana BiH doveli

bliže realizaciji, isto tako i prijatelji Bosne i Hercegovine.

Htio bih dati dva kratka komentara za koja vjerujem da su veoma relevantna za ovaj događaj – i veoma relevantna za zemlju kao cjelinu i okolnosti u kojima se ona sada nalazi.

Prvi se odnosi na neprijatnu, ali nepobitnu činjenicu da je Bosna i Hercegovina, u nekom smislu, zastala na svom evropskom putu.

Potrebni zakonski projekti su zatrpani, izgubljeni, zadržani ili jednostavno odbačeni iz parlamentarne procedure – ne zbog samih zakona, nego zato što jedan dio parlamentaraca svaki zakon koji se donese u državnom parlamentu smatra nekim vidom poraza.

To je za žaljenje, ali ja nisam ovdje danas da predvodim opštu žalopojku.

Umjesto toga, želim da preispitamo jedan pozitivan – i realan – scenario. Radi se o sljedećem: umjesto da intenzivira političke nesuglasice, izborna kampanja u stvari može početi da rješava ovu bezizlaznu situaciju.

To se može dogoditi ako ta situacija i sama postane dijelom izborne debate.

Prvo pitanje koje treba uputiti svakom kandidatu i svakoj stranci je sljedeće:

Šta si ti uradio ili uradila u parlamentu da se donesu zakoni kojima se BiH približava Evropi?

A pitanje se može postaviti i na drugi način.

Šta si ti uradio ili tvoja stranka na opstruiranju ovih zakona?

Niko ne treba da se zavarava – reforme koje će pomoći ovoj

zemlji ne opstruiraju same sebe.

Ljudi ih dosta puta aktivno opstruiraju.

Izborna kampanja predstavlja priliku za građane, medije i druge političare da zahtijevaju objašnjenje.

Druga stvar koju danas želim izreći je sljedeća: nepostojanje napretka u provedbi plana za integraciju u EU prati iznenadan i nagli porast siromaštva i nezaposlenosti.

A to nije slučajno.

Reforme koje će privući investicije i podstaći preduzeća da počnu s radom ovdje i donesu nova radna mjesta iste su one reforme koje se žrtvuju zbog političkih opstrukcija.

Izbori su biranje prave opcije. Građani Bosne i Hercegovine imaju opciju.

Mogu izabrati parlamentarce koji su pokazali da dovode stvari do kraja ili pak parlamentarce koji su pokazali da sprečavaju da se stvari dovedu do kraja.

To je stvarni izbor, jer obje te grupe postoje, naravno, i na opštinskom i na kantonalnom nivou. Na lokalnom nivou je lakše. Svako može zaustaviti načelnika i pitati zašto ovaj asfalt nije napravljen, a na višem nivou to je malo teže

Ne želim generalizirati i kritizirati sve političare u Bosni i Hercegovini, pogotovo one koji nisu prisutni, to mi nije namjera. Činjenica je da postoji određena količina energije i dobre volje u ovdašnjem političkom establišmentu – ali se ona posljednjih godina marginalizira.

Postoje političari koji zaista žele da uklone prepreke, ali i oni su marginalizirani.

Trenutna predizborna kampanja prilika je za sve te ljude da to javno kažu – da kažu da su oni za dovođenje stvari do kraja.

Ovogodišnja kampanja je od ključne važnosti, jer se četiri miliona građana jednostavno ne mogu prepustiti na milost i nemilost još četiri godine siromaštva i političkog stagniranja.

Reforme potrebne za integraciju u EU nisu samo potrebne – one su hitne, a postoje perspektive, i ovdje u Krajini. Vaši ljudi su sposobni, treba samo provesti prave reforme da bi ljudi svoje mogućnosti mogli iskoristiti kod kuće.

Ovi izbori moraju donijeti izbor one opcije koja će se fokusirati na te reforme. Izbor je vaš. Trećeg oktobra imate izbor, vi imate Bonska ovlaštenja – koristite ih.

Hvala vam.